

UDHËZIM
Nr.2, datë 20.9.2006

PËR ORGANIZIMIN DHE FUNKSIONIMIN E ZYRAVE RAJONALE ZGJEDHORE

Komisioni Qendror i Zgjedhjeve, në mbështetje të nenit 29, pika 1, dhe 17 të ligjit nr.9087, datë 19. 6. 2003 “Kodi Zgjedhor i Republikës së Shqipërisë”, i ndryshuar, si dhe vendimit të tij nr.54, datë 28.8.2006 “Për miratimin në parim të projektit për ringritjen e zyrave rajonale zgjedhore të KQZ-së për zgjedhjet për organet e qeverisjes vendore”,

UDHËZON:

PJESA I
TË PËRGJITHSHME

Neni 1

Qëllimi

Ky udhëzim ka për qëllim të rregullojë mënyrën e organizimit dhe funksionimit të zyrave rajonale zgjedhore, të drejtat dhe detyrimet e tyre, si dhe caktimin e rregullave mbi marrëdhëniet me KQZ-në dhe me të tretët.

Neni 2

Parime të përgjithshme

I. Zyrat rajonale zgjedhore ringrihen për të vendosur një koordinim dhe komunikim më të mirë dhe më efikas midis Komisionit Qendror të Zgjedhjeve dhe komiseve zgjedhore të niveleve më të ulëta, subjekteve zgjedhore dhe organeve të qeverisjes vendore, në funksion të miradministrimit të procesit zgjedhor, rritjes së transparencës në veprimtarinë e KQZ-së.

II.ZRZ-të kanë funksion mbështetës në punën e KQZ-së. Ato nuk kanë kompetenca vendimmarrëse.

Neni 3

Gjatë veprimtarisë së tyre, ZRZ-të udhëhiqen nga parimet bazë të administrimit të një procesi zgjedhor, si:

- a) ligjshmëria,
- b) transparenca,
- c) paanshmëria,
- d) profesionalizmi.

PJESA II

VENDNDODHJA DHE PERSONELI I ZYRAVE RAJONALE ZGJEDHORE

Neni 4

Vendndodhja

Zyrat rajonale zgjedhore ngrihen në qendrat e qarqeve.

Neni 5

Përbërja e personelit

ZRZ-të përbëhen nga inspektori rajonal dhe inspektorët e rretheve që përbëjnë qarkun përkatës.

Neni 6

Inspektori rajonal

Në përzgjedhjen e inspektorit rajonal mbahen parasysh këto kritere:

- a) Të këtë arsimin e lartë, me përparësi atë juridik;
- b) Të këtë jo më pak se dy vjet eksperiencë pune në administratë dhe/ose në fushën e zgjedhjeve;
- c) Të njohë programet bazë të kompjuterit;
- d) Të mos këtë lidhje gjinie dhe/ose krushqie deri në shkallën e dytë me ndonjë prej kandidatëve për kryetar bashkie a komune të njësive zgjedhore që përfshihen në qarkun përkatës;
- e) Të mos këtë qenë anëtar i forumeve drejtuese të ndonjë partie politike në tre vitet e fundit;
- f) Të mos jetë i zgjedhur dhe as kandidat në organet e qeverisjes vendore;
- g) Të mos jetë ushtarak, punonjës i policisë së shtetit dhe i Shërbimit Informativ Shtetëror;
- h) Të mos jetë i dënuar me vendim gjyqësor të formës së prerë dhe të mos jetë në ndjekje penale për çështje zgjedhore;
- i) Të jetë me banim në qytetin qendër qarku.

Neni 7

Inspektori i rrethit

Inspektori i rrethit duhet të plotësojë kriteret e përcaktuara në nenin 6 të këtij udhëzimi për inspektorin rajonal dhe duhet të jetë me banim në rrethin përkatës. Ai është ndihmësi i inspektorit rajonal në menaxhimin e problematikës së përditshme për rrethin që mbulon.

Neni 8

Dokumenti i identifikimit

Gjatë ushtrimit të detyrës, inspektori rajonal dhe inspektori i rrethit janë të detyruar të mbajnë në mënyrë të dukshme dokumentet e identifikimit sipas modelit që përdoret nga administrata e KQZ-së.

PJESA III

EMËRIMI, SHKARKIMI DHE LIRIMI I PERSONELIT TË ZYRËS RAJONALE ZGJEDHORE

Neni 9

Emërimi i personelit të zyrës rajonale zgjedhore

Personeli i zyrës rajonale zgjedhore emërohet nga Komisioni Qendror i Zgjedhjeve me propozim të Drejtorit të Drejtorisë së Komisioneve Zgjedhore, në përputhje me kriteret e përcaktuara në këtë udhëzim.

Neni 10

Shkarkimi dhe lirimi nga detyra i personelit të zyrës rajonale zgjedhore

I. Shkarkimi nga detyra i personelit të ZRZ-së bëhet nga KQZ-ja me propozim të Drejtorit të Drejtorisë së Komisioneve Zgjedhore, kur:

- a) nuk zbaton detyrat e ngarkuara;
- b) shkel parimet e përcaktuara në nenin 3 të këtij udhëzimi.

II. Lirimi nga detyra i personelit të ZRZ-së bëhet nga KQZ-ja me propozim të Drejtorit të Drejtorisë së Komisioneve Zgjedhore, kur:

- a) jep dorëheqjen;
- b) nuk plotëson kërkesat e nenit 6 të këtij udhëzimi.

PJESA IV

DETYRAT DHE TË DREJTAT E PERSONELIT TË ZYRËS RAJONALE ZGJEDHORE

Neni 11

Detyrat e personelit të zyrës rajonale zgjedhore

I. Personeli i zyrës rajonale zgjedhore ka për epror të drejtpërdrejtë Drejtorin e Drejtorisë së Komisioneve Zgjedhore dhe kryen detyra të karakterit ekzekutiv dhe organizativ, si më poshtë:

- a) Realizon përcjelljen në kohë të vendimeve dhe udhëzimeve të KQZ-së në KZQV, si dhe

përcjelljen e vendimeve të KZQV-ve në KQZ;

- b) Jep ndihmesë në organizimin e trajnimeve të komisionerëve zgjedhorë;
- c) Mban kontakte të vazhdueshme me organet e qeverisjes vendore për probleme logjistike të shpërndarjes dhe grumbullimit të materialeve zgjedhore brenda afateve të përcaktuara në ligj;
- d) Mban kontakte me subjektet zgjedhore vendore;
- e) Informon KQZ-në në mënyrë të vazhdueshme mbi aktivitetin e komisioneve zgjedhore vendore;
- f) Kryen detyra të tjera sipas udhëzimeve të marra nga KQZ-ja.

Neni 12

Të drejtat e personelit të zyrës rajonale zgjedhore

Personeli i ZRR-së gëzon mbështetjen e KQZ-së në kryerjen e detyrave të përcaktuara në këtë udhëzim. Atij i garantohen kushte të përshtatshme për zhvillimin normal të aktivitetit.

Neni 13

Komunikimi me Komisionin Qendror të Zgjedhjeve

I. ZRR-të janë të detyruara të njoftojnë menjëherë Drejtorinë e Komisioneve Zgjedhore për çdolloj informacioni apo raporti të çdolloj natyre. DKZ-ja njofton menjëherë Komisionin Qendror të Zgjedhjeve.

II. ZRR-të kanë detyrimin t'u përgjigjen kërkesave për informacion të çdo anëtari të KQZ-së dhe të komunikojmë drejtpërdrejt me ta.

PJESA V DISPOZITA TË FUNDIT

Neni 14

Koha e punës

Personeli i zyrës rajonale zgjedhore zhvillon aktivitetin e vet sipas orarit të punës që aplikohet nga administrata e KQZ-së.

Neni 15

Paga

Personeli i zyrës rajonale zgjedhore gëzon pagën e inspektorit të përkohshëm të KQZ-së.

Neni 16

Baza materiale dhe dokumentacioni

Baza materiale e marrë në dorëzim dhe dokumentacioni i përdorur nga personeli i zyrës rajonale zgjedhore, në përfundim të periudhës së funksionimit të saj, dorëzohet në KQZ.

Ky udhëzim hyn në fuqi menjëherë.

**KRYETARI
Çlirim Gjata**